



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 3



Tyson aser Mayweather na asayatsü jangjaogo

J&K statehood atema telemtetba yakta agitsü: Meghwal



VOL. XXIII ISSUE NO. 126 (ADOK 126) DIMAPUR RASEMNÜ (WEDNESDAY) TSÜKLAI (FEBRUARY) 18, 2026 ₹ 5.00

Tarique Rahman-i Bangladesh PM inyaker



February 17, 2026 nü Lok Sabha Speaker Om Birla-I Bangladesh Prime Minister Tarique Rahman ket nung PM Narendra Modi-i züluba shidi ka agütsüdag agiba noksa angur.

Guwahati/New Delhi, February 17, 2026 (Agencies): Bangladesh Nationalist Party (BNP) lennir Tarique Rahman-i Mongulbarnü Prime Minister inyaksü tezüngzüktep agiogo.

Arishi küm 60 tain Rahman ya taoba Prime Minister Khaleda Zia aser President Ziaur Rahman na jabaso lir.

2024 nung Bangladesh nung Sheikh Hasina'er sorkar atsüngdokba sülen Nobel laureate Muhammad Yunus-i anir interim government kati ketdangsüa aruogo.

Tanü tezüngzüktep agiba sentong ya presidential residence, Bangabhaban nung masü Jatiya Sangsad Bhaban indang South Plaza nung mezüng atema ayonga agiogo.

President Mohammed Shahabuddin-i Rahman aser par cabinet züngsemtem nem tezüngzüktep agidaksü.

Küm 20 shi jungnüa süia aruba sülen BNP-i Bangladesh elections nung takok tulu nguteta sorkar kümogo.

2013 nung Islamist party Jamaat-e-Islami ozüngi noktanga liasü aser Hasina atsüngdokba sülen iba telok nokdangba agien. Taküm elections nung Jamaat-e-Islami-i menden 68 nung takok nguogo.

Bhupen Borah-i Feb 22 nü BJP nung adentsü

Guwahati, February 17, 2026 (Agencies): Taoba Assam Congress president Bhupen Borah-i February 22, 2026 nü BJP nung adentsü ta Chief Minister Himanta Biswa Sarma-i Mongulbar nikongdang metetdaksü.

Guwahati nung Borah'er kidang osangbener senden ka alidang CM Sarma-i iba osang lemsatep.

CM Sarma-i Ghoramara area nung Borah'er kidangi oa pa den ajurutep aser iba sülen pa BJP nung adentsü osang ashi.

"Pa adenba ajanga party tashi

Election Commission-i Hasina'er Awami League indang registration agienba sülen election nung metoktepdaksü.

Bangladesh nung National Citizen Party dena Jamaat aser parnok den yaritepba teloktemi opposition ama shilem agitsü.

Rahman-i küm 17 tashi London nung self-imposed exile lia aru aser yaküm pa tetsü asütsü mapang ang Bangladesh-i meyipa aru.

"Kechi südir süang yimjung aser law & order tiptema ayutsü. Onok pusemertemi tayang meküpzüktsüla. Onok tensa raksaba magizüktsü" ta Rahman-i metetdaksüogo.

Iba sentong nung Lok Sabha Speaker Om Birla-i India tenüng nung aden aser idangji PM Narendra Modi ajanga Rahman jaokba indang shidi agütsü.

"Bangladesh Prime Minister Tarique Rahman den senden ka menogo. Prime Minister Narendra Modi-i salem shiokba aser pa tekaraba nung India-i arutsü jaokba shidi ni agütsüogo" ta Birla-i metetdaksü.

"Ni India nunger ajak tenüng nung tenüngsang agütsür aser kidanger linük ana tsüngda tesentaktep maneni alitsü atema tenangzükbä agishir" ta Om Birla-isa ashi.

aittsü kechiyong pa ya teküpoktiba jenjang nung alir lennir ka lir. Assam BJP president Dilip Saikia lia pai BJP nung adentsü" ta CM Sarma-isa ashi.

Bora-i mapang talangka Congress party nung timtem aruogo aser pai BJP nung kechi inyaknür inyaktettsü ta paisa shisem.

Borah-i Hombarnü Congress nungi sodi agiba shidi agüja liasü. Ajisüaka Congress lennirtemi pai züluba shidi magizük aser lemtet meyipa agitsü mesüzüktsü merangdanga liasü.

ANATG-2015 aser School Education tsüngda lemtet kecha magitet

Kohima, February 17, 2026 (TYO): All Nagaland Adhoc Teachers' Group (ANATG)-2015 Batch tesayurtemi tanü agi anogo 11 buba lungkak aitogo.

Mongulbarnü Directorate of School Education, Kohima nung ANATG-2015 Batch ketdangurtem aser School Education Advisor senden ka amen saka ghonda asem jungnüa menaka tangatettep kati maru.

School Education Advisor-i ANATG-2015 core committee züngsemtemi tanep 11:00 ako nung senden amentsü jaoka liasü. Iba senden nung Principal Director, Samagra Shiksha Joint

Mission Director, Directorate aser Secretariat ketdangsürtem den ANSTA teshimtet nübotem aden.

Olemtepdang ANATG-2015-i tesayurtem parnok balaka agiteta maparen inyaksü aser mapang tatakzük yur service regularization asütsü takhangba agütsübatem nenshi. Iba mapang ketdangsürtemi tebilemba aika benoka lemsatep saka tatem nung telok ana tsüngda tangatettep kati maruteti tembang.

"Onoki ola madoki anogo 11 buba lungkak aitha tiptema agiogo. Tanep 11:00 ako meta School Education Advisor-i ANATG den senden amentsü

jaok. Ghonda asem shi senden amen saka onok tsüngda tangatettep kati marutet" ta core committee züngsem kati ashi.

Iba senden amenba sülen ANATG-2015 tesayurtemi district ketdangpur ajanga lungkak aittsü mapang latettsüba ama senshi.

ANATG-2015 core committee-i Bodbarnü züngsem ajak den lokti senden ka amentsü aser idangji sorkar den jembitepba lemsateper lemtet agitsü ta metetdaksüogo.

ANATG-2015 Batch-i adhoc tesayur 1,166 regularise asütsü atema takhangba agüja arur.

Mokokchung nung tanur ka maitsü prokshiba aitsür

Dimapur, February 17, 2026 (TYO): Tanü-asüng tsüngda social media nung tekolok agi mabensaba tanur ka indang tejak sayua prokshiba atema tebilemtsü abener aser iba inyakyim aitsür ta Mokokchung District Child Welfare Committee (MDCWC)-i metetdaksüogo.

Iba tanur dak temenen tanüla lir ta shia noksa

prokshir saka iba ama tanur ka indang maitsü yimjak nung sayuba ya tanurtem temeten aser akhüm alema inyakba mapa lir ta MDCWC-i sangdong ka nung ashi.

Juvenile Justice (Care and protection of Children) Act, 2015 kübok anepalu aser teküzmükba nüngdakba tanur ka indang maitsü yimjak nung sayutsü noktanger aser iba amaji inyakra

ozüng kübok temerenshi lir ta Chairperson CWC Mokokchung-i sangdong nungsa shia lir.

Iba nung ajemdaker onoki media dang public nem iba tangatetba rajemdaksütsü aser tanur indang maitsü sayutsüsa osangtem yimjak nung meprokhitsü atema tesayuba agütsütsü ayongzüker ta CWC Mokokchung-isa metetdaksü.

NE state 4 nungi media telok kati Assam press tour senzür



Dimapur, February 17, 2026 (TYO): Manipur, Mizoram, Nagaland, aser Arunachal Pradesh nungi media teshimtet telok kati February 16 nungi 20, 2026 tashi Guwahati nung press tour senzüdar.

Iba sentong ya Press Information Bureau ajanga ayongzüker aser journalists 11 dena lir.

Assam nung terenlok maparen sayutsü aser sobaliba den rejutem lemsateptsü atema iba press tour ayongzüka agir.

Iba teshimtet telok nung The Sangai Express, The People's Chronicle, Aizawl Post, Arun Bhoomi, Tir Yimyim aser Eastern Mirror nungi journalist tem dena lir.

Parnoki Guwahati nung

National Data Centre for North Eastern Region semdang aser idangji Head & Senior Director (IT) Hiranmoyee Goswami, Senior Director (IT)/Scientist-F Naina Begem aser Senior Director (IT)/Scientist-F Sekhar Dey nungeri parnok agizük.

Iba mapang Deputy Director General, National Informatics Centre Ashish Asthana-i video conferencing ajanga media nisungtem den jembi.

Iba mapang data management systems, digital infrastructure aser technology-driven initiatives indang osang tejangja lemsatepa liasü.

Northeast state pezü nungi media telokisa Guwahati nung Northeast Frontier Railway headquarters semdang aser idakji

tongti ketdangsürtem den sensaksema liasü.

Chief Administrative Officer (CAO) Vivek Saxena aser Chief Public Relations Officer (CPRO) Kapinjal Sharma nati journalists den rail connectivity, infrastructure expansion, aser rail-based development initiatives indang osangtem lemsatep.

Parnok ya February 20 tashi Guwahati nung amungtsü aser idangji Pobitora Wildlife Sanctuary, North Eastern Development Finance Corporation Ltd, Indian Institute of Technology Guwahati, National Forensic Sciences University aser Assam Advanced Healthcare Innovation Initiative dena tesem aika sema senzütsü sentong lir.

Kohima nung District Level Workshop ka ayongzük



Kohima nung February 17, 2026 nü Aquifer Mapping sayaba mapang tangokba noksa ka nung Kohima Deputy Commissioner aser ketdangsürtem angur.

Dimapur, Tsüklai/February 17 (TYO): Central Ground Water Board (CGWB), North Eastern Region, Guwahati, Ministry of Jal Shakti, Government of India ajanga Deputy Commissioner, Kohima indang Conference Hall nung February 17, 2026 nü "Dissemination of Ground Water Data, Aquifer Mapping and Groundwater Management Plans of CGWB" indang District Level Workshop ka agia liasü.

Sentong akhumdong ka ama Deputy Commissioner, Kohima, B. Henok Buchem-i jembidang, CGWB nungi Regional Director, Chief Engineer, scientists aser shisalen sayurtem aser department balala nungi ketdangsürtem pela agizüka liasü.

Buchem-i ashiba agi, Central Ground Water Board ya linük nung agency tulutiba aser linük nung groundwater resources ketdang asütsü, bushitsü, asadangtsü, aser ozüing yanglua amshitsü, scientific inputs agütsütsü mela lir.

National Aquifer Mapping (NAQUIM) studies nungi bushitetba lemsateptsü, groundwater management indang awareness agütsütsü, case studies takok anguba lemsateptsü aser Ministry of Jal Shakti kübok scheme balala indang osang lemsateptsü asoshi iba workshop ya ayongzük ta pai ashi.

Sustainable development atema groundwater management ya tongtipang lir, anungji scientific data ya angateta sentong yanglutsü tongtipang lir ta ashi.

Kohima nung meyi mapang tzi tali aser mongpu mapang kanga ajema lir, anungji department balalai scientific inputs mapa kuma amshitsüla, ta ayongzük.

Iba workshop nung adenba department tem dang recommendations agütsütsü ashitsü aser itemji lokteper state sorkar nem proposal agütsütsü, ta DC Kohima-i metetdaksü.

Board ya North East nung küm aika inyaka arur aser region nung aser talisa Dimapur district nung groundwater exploration mapa inyaka arur, ta Regional Director, CGWB, North Eastern Region, Tapan Chakraborty-i ashi.

Tamalenbo lenden lima nung temulung tali agüja liasü, saka National Aquifer Mapping Programme (NAQUIM) kübok 2.0 phase nung tenem tekong nunga temulung agütsür ta ashi.

Tenem aliba states tem nung nüburtemi timba tzüpokdak amala nung metaloka alir, aser Kohima nung spring shed management asadangogo, ta pai ashi.

Pai stakeholders tem dang sentong junga yanglutsü atema CGWB data amshitsü

ayongzüka liasü.

Tetushi tesemdanger ka ama Chief Engineer, Water Resources Department, Nagaland, Er. Thepfusalie Guozü-i iba sentong nung jembidang CGWB ajanga workshop ayongzükba atema pelaba lemsatepa liasü.

Nagaland nung ayong tila nungi tzi tajung peria lir aser yangji tongtipang minerals peria lir. Ajisüaka tangbo natural water sources akonger mesüra menener, anungji tarutsü putu asoshi itemji kumzüka ayutsüla aser anepalua amshitsüla, ta pai ashi.

Freshwater resources shilem 30 jungnüa groundwater ya lir aser ibai tatem makai amshitetsüba masü, anungji kanga kumdanga amshitsüla, ta ashi.

Technical session mapang Anenuo Pienyu, Scientist-C, CGWB, State Unit Office, Shillong ajanga Kohima district nung aquifer mapping aser spring shed management studies nungi bushitetba lemsatepa liasü.

Kasa mapang Dr. S S Singh, Scientist- D, CGWB, NER, Guwahati ajanga CGWB indang inyakyim lemsatepa liasü.

Iba workshop nungya cgwbdata.gov.in, IN-GRESS aser IndiaWRIS ama web portals aser GIS tool ajanga data amshiba indang sayu aser sensaksemba mapang agia liasü.

OJALA TASOBA ANOGO TEPELA



Ojala **Imsüwala**, (Akhoya) küm 104 abensaba anogo den la Dimapur-i arur kinunger tamang sarasadema telungjem sentep tenzüker küm 25 abensaba sentong 18-02-2026 anogo nung amonger. Takar Tsüngremi ojala maneni anema aliba aser arishi moajang ta sarasademsür.

~ **Chimur aser Semchisemnurtem**

Nagaland Police-i Tenant Registration App amshitsü ajungshir

Dimapur, Tsüklai/February 17 (TYO): Nagaland Police-i nüburtem dang OTP-based verification ajanga Tenant Registration App amshitsü ayongzüker, koba para ki nung alir aser ki kibur tenüing zülüoktsü nükjidong nung lir.

Ki kibur aser para ki nung alir temi para ki nung alir ajunga mapang shidak nung registration asüba ajanga state sorkar aser

ozüing amshir temi anti-social elements aser illegal immigrants tajungba nung putettsü aser nüburtem kumzüka alitsü asoshi jelia mera agitettsü, ta ashi.

Iba app ya Nagaland Police indang website police.nagaland.gov.in nungi download sütettsü aser yakta Google Play Store nunga angutsü, ta Nagaland Police ajangasa ashi.

Workshop aser osettsüset lema agütsüba sentong agi



Kohima, Tsüklai/February 17 (TYO): Wokha nung Mongulbarnü Cluster Development Programme for Medicinal, Aromatic, Floriculture and Apiculture crops kübok workshop-cum-distribution programme on quality planting materials sentong agia liasü.

Iba sentong ya District Administration aser CSIR-North East Institute of Science

& Technology (NEIST), Jorhat, Assam ajanga ICAR-KVK, Wokha den lungjemmer ayongzüka liasü.

Deputy Commissioner, Wokha, Vineet Kumar-i iba sentong nung jembidang, Wokha ya cluster framework kübok model ka kumdaksütsü nükjidong lir, kong ali den apet aser market nung bushiba nung ajemdaker aonsotsü tem shiba yoktsü, ta ashi.

Chozuba nung Marketing & Entrepreneurship workshop kaogo



Vamuzo Memorial Hall, Chozuba, Phek nung February 16, 2026 nü Marketing & Entrepreneurship indang workshop agidang tangokba noksa nung angur.

Dimapur, Tsüklai/February 17 (TYO): PM Vishwakarma kübok Marketing & Entrepreneurship Orientation Workshop ka February 16, 2026 nü Vamuzo Memorial Hall, Chozuba, Phek nung takok ngua agiogo.

Entrepreneurship, marketing, digital

formalization, aser financial literacy tsütsü artisans aser tajangzük angurtem nem awareness agüja parnok tashi ulushidaksütsü nükjidong nung iba workshop ya ayongzüka liasü.

Heinamgwanbe Nsarangbe, General Manager, DIC-Chozuba, Phek ajanga

PM Vishwakarma scheme indang nükjidong lemsatep aser shilem agirtem dang training tajangzük agia pei entrepreneurial ventures tashi itshitsü ajungshia liasü.

Mezüngbuba session nung Ministry of MSME aser state sorkar kübok scheme balala nung rangloker Veswovo

Phesao, Functional Manager, DIC-Chozuba ajanga agia liasü.

Tanabuba session nung Victoria, SLPMU ajanga Entrepreneurship Development Programme (EDP), branding, advertising aser packaging indang agia liasü.

Session tasembuba ya Avelu, Project Assistant, RAMP, Phek-i ahgi, kong Udyam registration aser QR code integration kübok PM Vishwakarma indang tajangzük lemsatepa liasü. Iba mapang lai Udyam registration, digital payments aser business formalization indang rateta ashi.

Session pezü buba ya financial literacy aser banking dak sendakba nung liasü, kong Ronald Lepcha, Branch Manager, SBI, Chozuba ajanga financial literacy, banking services, credit facilities amala indang angatetdaksü.

Iba sentong nung nisung 100 dak tema den sorkar ketdangsür aser shisalen sayurtem dena liasü.

**OFFICE OF THE
LIRMEN SENSO MUNGDANG**B.P.O. LONGCHEM - 798604
DIST. MOKOKCHUNG : NAGALAND*Nük: "Telangjem aser Terenlak"***LIRMEN SENSO MUNGDANG LEMTET SANGDONGER**

20th November 2023 anogo NSCN (IM) CAO Ao Region Court-i Lirmen yimdak Jangta Moli kidong tenüng amshitsü telemtetba obendang agüja alibaji, 63 Buba Lirmen Senso Mungdang-i aitsür, aser iba obendang magizüker ta tanü, 13th Febuary 2026 anogo nung Lirmen Senso Mungdang lemtet sangdonger.

**(K. LONGRI IMCHEN)
PRESIDENT****(B. LANUWATI LONGCHAR)
GENERAL SECRETARY****PM Modi aser Macron nati H-125 helicopter assembly line lapoktsü**

New Delhi, Tsüklai/February 17 (Agencies): Ato Kilonser Narendra Modi-i Mongolbarnü France tir Emmanuel Macron den H-125 helicopters assembly line lapoktsüba mapang France ya 'special partner' ta aja.

Modi aser Macron nati Vemagal, Karnataka nung Tata Airbus indang H-125 Light Utility Helicopter Final Assembly line virtually lapokja liasü.

H-125 helicopter indang jembiba mapang Modi-i, India aser France nati India nung Mount Everest tenem kolak tonga yima tutetba helicopter ka yanglutsü ta ashiba den,

linük ana yagi tesendaktep ya special global strategic partnership jenjangi ajungkettsü telemtetba agiogo, ta shisem. Pai iba olen ya Mumbai nung Macron den külemi osangbenertem den sensaksemba mapang ashi.

Linük ana bilateral tesendaktep ya 'Special Global Strategic Partnership' jenjang kati ajungketogo aser PM Modi-i ashiba agi linük ana tsüngda tesendaktep ya kecha arrtsü mali aser tesendaktep yagi tzüym taroktiba aser tenem talangtiba den atongtsü. "India aser France na tesendaktep kecha arrtsü mali.

Tanü mesüngjemteti aliba lima ka nung iba tesendaktep ya alima manokshidaktsütsü atema lir," ta Modi-i osangbener den sensaksemba mapang ashi.

Macron anogo asem atema India semdangtsü atema Mongolbar anepdang Mumbai tonga aruogo. India semdangba mapang pa India Impact Summit 2026 nung adentsü aser PM Modi den bilateral sensaksem balala nung shilem agitsü.

Macron ya February 18 aser 19 nü AI Impact Summit 2026 nung adentsü, koba New Delhi nung agidar.

Bill Gates India AI summit nung adentsü

New Delhi, Tsüklai/February 17 (Agencies): Billionaire Microsoft co-founder Bill Gates AI Impact Summit nung adentsü aser renema aliba ama o jembitsü, ta pa otongdari Mongolbarnü jangjatsüogo. Iba ajanga pa iba sentong nung shilem agitsü magitsü mejangjai aliba jangjashitsüogo.

Osang balala ajanga, Gates tenüng 'Global Visionaries' list nung maliba sülen pa tang Delhi nung agia aliba AI Summit nung madentsü ta metetdaktsüba sülen tang ken o jangjashitsüogo.

Sorkar source kati taoba mapang News18 dang Gates ya Epstein files dak sendaka nung mepetmesü adoker aliba mapang mepaitoktetba mapren kar ajanga iba summit nung medentettsü ta shir liasü.

"India ya artificial intelligence dak sendakba nung alima nung lenir ka lir. India nem AI talent pools tulutiba agi tashi agütsür, sector ajak nung iba ya benoka inyar. Ato Kilonser Narendra Modi lenisüba nung AI ya India indang nukla Viksit Bharat teyongtsü ka kümogo aser iba ajanga linük renlokdkaktsür," ta Gates Foundation-i X ajanga ashi

"India indang public-private

model balaka aliba, koba ajanga sorkar, startups, academia, aser industry tem longjemdaktsür iba ajanga AI ya temelenshi adokdkaktsütsü, ajak anisemtsü aser alima atema yanglua amshitettsü ta kuli agütsür," ta kasa sangdong ajangsa metetdaktsü.

Taoba hopta Nvidia-i ashiba agi, CEO Jensen Huang iba Summit nung adentsü atema India-i marutsü. Huang ya iba Summit atema kanga tongtibang nisung ka liasü.

Gates-i taoba mapanga Andhra Pradesh semdangogo, kong pai AI aser technology agi state renloka odaktsüba atema tenüsang agüja liasü. Amaravati semdangba sülen Gates-i, health, aluyimba aser shisaluyim nung iba state indang innovation tem ngua kanga nukshia reprangba lemsatepa liasü.

Bharat Mandapam nung AI Impact Summit 2026 ya Ato Kilonser Narendra Modi-i lapoktsü, koba ajanga responsible & inclusive Artificial Intelligence atema India bendanga agütsür aliba sayur. Iba Summit yagi policy yanglurtem, technology company, innovator, academia aser industry lenirtem longjemdaktsür.

J&K statehood atema telemtetba yakta agitsü: Meghwal

New Delhi, Tsüklai/February 17 (Agencies): Union minister for law and justice Arjun Ram Meghwal-i Mongolbarnü Srinagar nung ashiba agi, Jammu and Kashmir nem state jenjang agütsütsü atema telemtetba agiba osang yakta angashitsü.

Srinagar nung Sher-i-Kashmir International Conference Centre (SKICC) nung osangbenertem den sensaksemba mapang Meghwal-i ashiba agi, iba ken o ya kanga dang tasak, saka inyakyim shitak benoka inyaktsü atema Centre bendanga agütsür lir.

Meghwal-isa, home minister Amit Shah-i Lok Sabha nung inyakyim shitak benoka inyaktsü aser nüburtem nem parnok kechi tangutsü tim ali aji agütsütsü ta tenangzükba agütsüogo, ta ashi.

Pa lenisüba nung Tele-Law (DISHA) scheme dak sendakba nung regional

workshop ka agütsütsü asoshi Meghwal Srinagar-i oa liasü. Iba scheme ya technology-i teyari agütsüba legal service tem dak sendaka lir. Ajisüaka yimden yimsüsüba dak sendakba nung pai iba olen lemsatepba yagi ajak atsüa arua liasü.

Chief minister Omar Abdullah, shiba iba sentong nung dena liasü, paia minister-i iba osang agütsüba ya yakta ataloktsü imla ataba lemsatepa liasü. Abdullah-i ashiba agi pai aniba sorkar Centre den maneni sensaksema arudar aser inyakyim ya parnoki imlaba dang nungi talangba agir ta shisem.

Paisa, Jammu and Kashmir nung aliba nüburtem iba osang tajung atema küm ka ser tesadang ataogo ta ashiba den, Union minister-i telemtetba ka takaratiba nung agitsü ta ashiba ya asangsang nung ataloktsü imla atar.

'Tughlaqi Commission' BJP tenüng nung inyaker: Mamata

New Delhi, Tsüklai/February 17 (Agencies): Intensive roll revision dak sendakba nung West Bengal sorkar aser election commission na maneni mangatettep adoka arudar aser chief minister Mamata Banerjee-i, BJP metetshi-i election commission ya political party kati anishir ta ashi.

Election commission anema jembiba mapang Mamata-i, iba lokti tentet ya "Tughlaqi Commission" ka ta ashi. "Tughlaqi" ojang amshiba ya aso 14buba nung Delhi yimsüsür

Muhammad bin Tughlaq nungi jakzükba lir, shiba ajungbena sentong junga meyanglui tim masüba mapatem benoka inyakba atema kanga nüngtugu lir.

Election commission yagi nüburtem kiralongrar ama amshir ta shia CM Mamata-i, EC-i Special Intensive Revision (SIR) dak sendakba nung Supreme Court tetuyuba anema inyaksangshir aser parnoki voter tem dak rangloker inyakba den democracy tashi meiti kümdaktsür, ta ashi.

Mamata-isa, election agitsü aliba West Bengal state nung BJP IT cell nung inyaker tetsür kati AI amshia Bengal nung voter lakh 58 tenüng agintsüogo, ta ashi.

TMC tekolakbai yagi ashiba agi, Bengal nung SIR khuret makok Bengal nung nisung 160 taküm samaogo.

Election commission-i Bengal sorkar tenzükertem merenshira lar sorkari noklang nung noklang parnok kümzuka ayutsü ta ashi.

Election commission-i Bengal nung SIR inyakyim nung shilem agia aliba assistant electoral registration officers (AEROs) tenet suspend sütsüba sülen anogo ka lir lai iba olen ya lemsatepa liasü. Parnok yagi inyakyim nung aibelen aser parnok tashi mashiyimi amshi ta shia mapang nungi suspend sütsü.

Commission-isa, Bengal chief secretary dang parnok anema jenjang tapet agitsü aser parnok ajema jenjang agiba indang metetdaktsütsü tetuyuba agütsüogo.

Taoba hopta Supreme Court-i state nung electoral rolls special intensive revision benoka inyaka aliba kecha nema minprong mesüdaktsütsü ta shiogo.



TIR YIMYIM YIMOBILEM (EDITRIAL)

DIMAPUR WEDNESDAY, FEBRUARY (TSÜKLAI) 18, 2026

Temenen makoker asü ?

Asenok dangi Yisu temeim osang tajung marudang, asen tetsü teboutemi Teyanglur Tsüngrem masü saka Teyanglur Tsüngremi yangluba anü ita aser süng long külema liasü, anungji süng aser longji tsüngrem kümdaktsü. Item dangji alima temenen tsüngremtem ta ajar. Item alima temenen tsüngremtemji asen tsüraburtemi külemba mapang parnok tenük agi ngua aser tenarong agia angashi senzü . Aji oda, asen tsürabur limapur yimsü nungi Yisu Khrista temeim angateta taküm Tsüngrem dangi temulung meyipa Khristan akümba mapang, item temenentemji aoba olaa angashia yipru mopong nung oa adokba tatalokba otsütema lir. Aji oda, asenoki Yisu Khrista dak amangba tamang agi mekoktetba mapangbo kima yimdong nunga temenen senzüba agi aonungbo mesenzütet tetsübu tulu nung liasü. Iba amaji asen tsürabur limapur asüba mapangbo külen menen moiing tsübur aser külen tangar bendanger tsükchir tsübur ta tetsübu tia nung liasü. Ajisüaka, kodang asenoki Yisu temeim yimsü agizük, item tetsübutü ajakji mali aküm aser asenoksasa asenok tetsübu nung puoka aliba Yisui salatsü aser asenok nüchi aküm. Osang tajung agi asenok atongba mapaji aji lir, anungji joko tangbo temenen moiingi asenok tsübur saka asenoki Yisu Khrista aser tebu Tsüngrem tsübuba dak alaka shinga metsübur. Ajisüaka, tang tashi asenok temenen moiing tsübuba agi pei kidang nungia matoktet aser kima yimdong nunga mesenzüteti lira, asenok dak nungi Tsüngrem tanela oadokba tamaitü asütsü, kechiyong Tsüngremibo asenok nem tetsübu tanela magütsü saka tetsübu tanela koktetba tashiang agüja lir. Ibaji kodang asenoki angatetdir, tawa tanü asen lima nung sowar ama nisung meshitak ajurubaji tia majung ama bilema jembibaji asenoki amangba Tsüngrem nem masü saka tetsübu temenen tanela nem asenok kokdaktsüba mapa ka asütsü. Aji oda, asen lima nung aonung temeneni ki shia akoshia arutsü aser idangji ki lapoktsürtembo asütsü ta olulu jembibaji, Yisu Khristaji pei taküm aser kibong nung dang masü saka pei lima nunga kibur aser kümtetdakba ta amanga arur küm 150 dak tali amanga arurtem rongnung amanga jembiteperbo memesük. Ashiko, iba ama osangji shiner kar bang nungi adokba osang alitsüa akok, ajisüaka asenok angashiba o tem shiaji shitak asü meshitakar bendangteta metettsü asoshi asenok nem Tsüngremi tangatetba tashi agüja lir. Iba tangatetbaji asenoki mangur aser mangashir, kechiyong ibaji tamang lir. Atangji alima nung temenen moiing lir, itemji kar asenok tsübudaktsüba temenen tanela aser kar asenok Tsüngrem nungi piladaktsütsü asoshi ashioktsüba temenen tanelatem lir. Ajisüaka, asenoki asenok tsübudaktsütsüa inyakba temenen tanelatema mekoktet nungbo asenok Tsüngrem nungi piladaktsütsü asoshi ashioktsüba temenen tanelatem, koba agi asenok dang ochimashi inyaktsü, nüktapangtatsü aser tangar majung asüktsü indang ajungshir, item tsüngdangjibo tonga marudangyongi laoadoktsü. Aji oda, alima asünungji kibongtem nung tasor ajakbo tabensa masütsü saka mabensaba ajakji asenoki temenen tanela aketba nisung amato züngshira, asenokang mabensa asütsü. Aiben asenoki asen temang nung Blood Pressure meshitaki kümer asenok laoa adok nung, temenen moiingi nungoktsüa ta bilemer. Kasaji asenok kar temesen aser tezüng majungba agi o belen jembia tenzük nung temenen tanela agi pur yiar ta jembir, anungji mozü shiteter tajung bushia oagi temang anepalutsü melen mojing arüja sarasademer saka makoker. Kasaji, nisung kar tera mabensa amato senzüya angu nung, asenoki itemji mojing senzür amai dang ngura asenok tanela tenük rabanga yua aliba tamaitü asütsü. Atangji, tanübo alima nung temenen moiing ya arem aser kima yimdong nung masü saka asenok den asen mulungjang nung lir. Iba jagi asenok kima yimdong sema menen moiing aridoka sarasadema jajar, saka meyipa arur asenok alidak asenoki tapu-tapu adjustment agia ochimashiba temenen mapatem inyaker. Iba jagi asenokang temenen moiing kümer tsübuseta alir. Iba tetsübu nungi asenok salatsüa Tsüngrem nungi tashi aser tangatetba kanga nungdaka kümogo.

OLEMSABANG

AKÜMLIR MONGJEN :

- Talitemjen Imchen

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem)

(Yash adok nungi...)

Panü jibo kibong nung kinüngtsüi anir shilumanemer ajak aneper pelatepa, teyungyaba tulu nung kidang alirtem ji, pa adok ataa liasü. Pai kibong nung shilumanemer ajak aneper alibaji ngua tepela tulu nung, "Lijaba-i aneptsüogo, Lijaba-i aneptsüogo" ta pelaseta kima-i lur pongtenmeso. Yimertem-i pa pongtenba ji ngua, ratatepa ki jagi angudang nung, par kibong nung shiranger ajak aneper angu. Parnok kanga süngmangtepa sayatenya ji kong nungi ta asüngdang. Pai Lijaba bushia külemba yimatemji ashi. Ibaji dang masü yimertemji among jagi anir oa, Lijaba jajaba tsüngsü remaba tesem ji sayu. Pai Lijaba külemer adokba sülen, akhi ama kidang kiset shirurutem aser alu tsünüsempongtsütem azükaru tenzük. Yimertem-ia Lijaba o Tiapetzük na libaliru aser sayatenya ji ngua, alima nung nisungsangla dang nungi tuluba ka lir ta meteta aru. Parnoki Nisungsangla dang nungi tuluba dangji, Tiapetzük-i ajaba ama LIJABA ta aja. Ano Lijaba tsüngsü remaba tesüngmangtsükuli ji ngua Lijaba dangji TSÜNGREM taa aja. Iba sülen yimertem kibong nung shilumanem agi atong danga, pai sayuba yimya nung külem. Alu nung aser kidang kiset shirurutem nung moameji mali azükaru masü danga, Tiapetzük-i beshiba kasa yima nung, kechi tashidak ajanga kibong ji kangshirar aser koba meta nung aibelenar amsüdang-a bushi. Itemji anema pongdoktsü asoshi kinüngtsü aser tanurtem den pilar mejang. Achi ajem anena yur, Lijaba dang kukua asüngdang. Parnok-i iba dangji ANEMPONG ta aja. Lijaba-i sayatenya ajanga aneptsüba ji, kuli ngua tejangjaba nung Lijaba ji lir ta tamang ulushi. Parnoki Lijaba bushidang am südanga bushiba dangji AMSÜ ta aja. Lia liabo aremi dang oa süng, long mesüra meta tesem balala nungji külem masü, yimdak kimong mesemteta Lijaba ji külemtsü tenzük. Joko kijai dang masü saka telok tenteta, tenla tuluba bena külem. Yimdak kimong mesemteta külemba dangji TEKÜLEM kimong ta aja.

Akümlir yimya ama, Tiapetzük küm nung tain kümer, temang mekokmin agi sünger, inra agi tasütsü shirang tenzük. Pa tasütsü anogo ishika jilia lia, anüng tom talang nungi Mongzü ana arur, yimti ji meküta yimzü. Yimti nung alirtem-i Mongzü ana yimzüba ji repranga ata nung, yakta dang Tiapetzük-er ki ji meküta anüng nungji yimzümeso. Iba mapang kinüngtsü Sangrona-i, lar ki tema nung Mongzü ana yimzüba ji ngua kima-i alur, "Kü kinüngbo Tiapetzük tetsü o tebu na tanela süra, tsü ya jemer meyipa oang ni" ta shir anüng len jagi tsü ji shiküta yuk. Mongzü ana jagi Sangrona-i ashiba o ji angashir, tashi anga meyipa tarulen-i ao. Yakta dang la kidangi atur kinüngbo Tiapetzük dang tatalokbatem ji ashi. Pai kinüngtsü dang, joko ni tasütsü mapang atonger," "Kütsü o kübu na ni tani arur," "Ni asü nübo alima yimyayimpong ji balaka asütsü saka ratamata masütsüla." "Yimti asoshi tatishitsü tajung dang asütsü" ta temang mesepshiteti, ola ji akhi ama repteta masü, saka angateta tejak sangwasangwa kümer ashi.

Pa shirang tenzüker, anogo terok nü buba anepdang, anüji kanga tepur junga adok. Anüng nung mepet-a mali, anüpu ji sashisashir. Saka anüngdang anüji sentsü temesüng kati nair angu. Yimertem-i anü sentsü temesüng agi naipangba ji ngur süngmangtepa aliba mapang ka, nikongtsütsü Tiapetzük alima nungi pila. Paonung ji yipru tulu aita tsünglu kanga sashia aru. Yimertem-i takotet Tiapetzük asüba agi, Lijaba-i mang yima yipru yuker ta jembir. Ibaji dang masü Lijaba ama nisungsangla dang nungi tuluba kati tanela bener aoba tamaitü, anüng nungi tsünglu yuker ta amang. Yimertem-i anü kodang nair lildir takotet nisung asur ta dakzü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Yimtsüng kanung Khristanpur nokdanga aliba SC-i magientsü

New Delhi, Tsüklai/February 17 (Agencies): Chhattisgarh kübok yimtsüng ka nung putu menden ajanga Khristan missionary aser tamangertem iba yimtsüngi aittsü tenokdangba agüja al8iba agienjang ta Supreme Court dangi ken o abenba magizük.

Chhattisgarh High Court, Bilaspur nung October 2025 obendang nung February 16 nü court-i teka amoshitsü memulung. Iba court ajanga petitioner dang state indang Panchayat (Extension to Scheduled Areas) Rules kübok ketdangsürtem bushia aotsü tuyu, kobai tribal areas nung par sasa yimsü asür.

Iba ken o ya Kanker district kübok yimtsüng kar nung pastor tem densema Khristan missionary aser Khristanpur danga yimsü nungi temulung meyiper alirtem yimtsüng telungi aitba nokdanga taoba küm July ita hoardings inokba nung tenzük.

Tribal areas nung putu menden ya özüng agi melaba local self-government ama inyaker, aser tamangba yimsü melendaktsüba azüoktsü nükjidong nung iba mera agi ta parnoki ashi.

Iba region nungi Protestant Khristan Digbal Tandi-i iba tenokdangba anema Chhattisgarh High Court nung ken o benoka constitution nung Khristanpur nem temeden agüja aliba nung aibelener ta ashi. Pai iba totuyuba ya agiendaktsütsü meranga liasü.

High Court-i pa indang petition ya magizük aser lisopur tejangraba aser yangji aliba sobaliba senmang wazüka ayutsü asoshi tekum dangtsü mera ka ama iba tenokdangba ya agütsü, ta ashi. Tandi-i iba ken o Supreme Court dangi aben.

Petition agütsür tenüng nung Advocate Colin Gonsalves-i ashiba agi, High Court yagi record tejangja kuli kecha makai iba obendang agütsüba ajanga tribal areas nung missionary inyakyim nung tetsükdaktsü ajurur ta shia liasü.

Ajisüaka Supreme Court-i iba ken o magizük aser petitioner dang putu menden mesüra PESA inyakyim kübok tapet ketdangsür nungi temelaba meshitsü ashi.

"Iba ama tapi agi totuyuba agütsüba nung Supreme Court shilem magitsü mulungtetba ya aoksar," ta Pastor Joy Mathew-i ashi, shibai Uttar Pradesh nung timtem balala ajurua aliba Khristanpur nem legal assistance agütsür.

"Freedom of movement ya fundamental right lir, aser ibaji agienba ya magizükteter," ta Mathew-i UCA News dang February 17 nü ashi.

Mesüzükba mesüra tashiyim amshia tamangba yimsü melendaktsü ta tai tongloksüba atema petitioner-i state sorkari nungi kuli bushitsüla, aser putu menden ajanga totuyuba agütsüba nung kuli tejangja maka, ta pai ashi.

"Iba ken o nung constitutional courts anaprongi Khristanpur fundamental rights wazüka meyutet. Onoki ano lenmang danga bushir, kechiaser senso shia temeden wazüka ayutsü court mapa lir," ta Tandi-i ashi.

Tandi-i ashiba agi, July 2025 mapang yimtsüng ishika nung tenzükba prokshia aor. Tang Chhattisgarh state kübok yimtsüng 19 shi nem Khristanpur yimtsüngi maitdaktsütsü tenokdangba agüja boards amenoka lir, ta pai ashi. Iba mesük tenokdangba ya Odisha aser Jharkhand states tem nunga inyakba osang lir ta ashi.

Iba ama tenokdangba agüja aliba melatsü atema court temi state sorkar nungi kuli meshitsüla, ta taoba mapang Delhi State Minorities Commission nung züngsema alisang A.C. Michael-i ashi.

"Kuli tejangja monguteti tamangba yimsü melendaktsü ta tai tongloksüba nung ajemdaker Khristanpur indang constitutional rights magütsür, koba kanga tia maka lir," ta Michael-ia UCA News dang Mongulbarnü ashi.

"Khristanpuri tashiyim amshia

nüburtem temulung meyipdaktsüba kuli lira, itemi yimjak nung sangdongtsüla. Tai tongloksüba kisüng nung ajemdaker India nung court katia aja mali ta ashi.

Supreme Court-i September 2022 nung federal government aser states ti dang tashiyim amshia tamangba yimsü melendaktsüba ken o tem indang data agütsütsü shia lir. Saka tanü tashi iba amala list agüja mali, ta Michael-i ashi.

India nung nütsüng yongsük 1.4 billion aliba nungi Khristanpur shilem 2.3 dang lir aser Hindu nunger shilem 80 shi lir.

Tenüngsang ken mejemer Karen Lafferty-i Nagaland semdang



Karen Lafferty-i February 15, 2026 nü DPRO Wokha, Lolano Patton nem la indang kaket Seek ye First, The Karen Lafferty Story agütsüdang tangokba noksa nung angur.

Dimapur, Tsüklai/February 17 (TYO): Tamanger temi kanga sapua atenba "Seek Ye First" ken mejemla Karen Lafferty-i February 8, 2026 nü Nagaland semdanga liasü.

Lai Kohima nung arogo asem semdanga yangji tamangertem dang Tsüngrem dak tamang akatsü aser Tsüngrem mezüng bushitsü ajungshia liasü.

Lai la indang takum kuli, ken amala lemsatepa lanurtem dang mission mapa nung mapang agütsütsü ajungmeso aser

ANOGO ABEN TSÜNGREM DEN

Khristan tamang shitakba

"Ne dak aliba iba tamayazü tamang kü nem bilemtetdaktsüogo" (II Tim. 1:5)

Tila ka nung shibai ochishia alir, iba nisung nem Tsüngrem yimli nung tuluka nungloksütsü ta Yisu-i ashir. Timoti, takümü anogoshia Tsüngrem peladaktsütsü asoshi ali aser iba ajanga pa tenung tajung aka. Anungji Paul-i Timoti den külemi inyaktsü asoshi shim.

Kodang Timoti tenzükba wadang nung timtem mapang ajuru, pa tenzükba nung taremzük aser ochishiba akatsü asoshi Paul-i pa ajungshi. Timoti tamang kanga anokshi saka pai maneni Khrista dak azüita amang.

Takum nung timtem, tejashi, khuret ajuruyonga Timoti ama tamang akaba ajanga, kechi ne nem nungloksü lir, idakji takok ngua inyaktetter. Aser iba nung jagi ochishibaji adokdaktsür. Tanu kechi Tsüngrem-i ne nem aguja lir, iba dang nungi tuluba ne nem nungloksütsü. Anungji tamang tali dang ka-ang aser tsüngchir nisung ka kümang.

Iba mapang ken mejemer den külemi yangji alirtem iba ken ya tena liasü.

Lafferty-i Naga nunger dang pelaba lemsatep aser nüburtem dak ajemalu, telemla aser dangar tenzükba tenüngsang agütsü.

Nagaland ya Khristanpur timba aliba state ka asünung, lanur tali state alema missionary mapa inyaki aotsüla, ta lai ashi. Naga nungertem Khristan kibong nungi intet asünung lanuwa nungi Tsüngrem o angazüka lir, anungji parnok tamang lemsateptsü parnok renema lir, ta ashi.

Lai Patton nem la indang kaket Seek Ye First, The Karen Lafferty Story agüja liasü.

Karen Lafferty ya America nunger Khristan ken atener, mejemer aser missionary ka lir. Lai Mathi 6:33 nung ajemdaker "Seek Ye First" ken ya 1971 küm zülua liasü.

Lafferty-i ministrt mapa inyaka linük balala sema jajar aser tamangertem ajungmesoa mission mapa nung yariteper.

Arishi küm 78 tain Karen ya tang tashi tashi ita Tsüngrem tenzüker aser Prayer ministry ka tenzüksü ta ashir. Ni temang anema lira ni ano Nagaland semdangtsü, ta Karen-i ashi.

Delhi nung "Asen Atepzüng Tiptemdi" sentong agi



Dimapur, Tsüklai/February 17 (TYO): ABAM Women Ministry ajanga ayonga "Asen Atepzüng Tiptemdi" (Esther 4:16) omen nung Pastor kinungtsürtem asoshi Delhi yimtiba nung sentong ka Tsüklai 11-15, 2026 kanga takok ngua agiogo.

Iba ya Sannüker kinungtsürtem asoshi angazükshiba sentong ka liasü.

Asen tenzükba wadang asen atepzüng nungi tenzüker. Ni jungra kibongji ajungtsu! Kibong jungra lokti arogo ajak ajungtsü. Asen atepzüng nungi tanela taküm yimya kechi angazüker, ibaji lokti aser arogo dangi bener aor. Yamaji, arogo nung Sannüker kinungtsü kaji kanga tongtimbang aser pei tajaba tejangja angateta tenzüksü

aser kinungbu tenzükba nung bendanga agüja nungitsü aser lenla balala nung awashiyim tesayuba agütsü, ta Rev. Temsü Jamir, Executive Secretary, ABAM ajanga sangdong ka nung ashi.

ABAM WM nung tenzükertemi omen dak rangloker tesayuba balala agütsüba dak alaka, Delhi temeket tesemtem semdanga

tangazükba aika nguogo. Arogo 54 nungi sannüker kinungtsütem 64 den ABAM WM nungi 4, ajak agi 68 oa kanga temoatsü nguogo. Sannüker kinungtsürtemi ano tanela aser libaliru nung küm kümshia arogo nung shilem agiba ajanga Arogotem nung Tsüngremi mapa tulu inyaktsü tamang ayur.

Iba sentong nung Delhi Ao

Baptist Arogo nung Associate Pastori anir arogo nung tenzüker, tenzükla aser amangbapurtemi nüngdakba maparen ajak achaaangtsüba asoshi pelaba metetdaktsür. Tsüngremi Delhi Ao Baptist Arogo asen Aortem aser Naga nunger ajak asoshi maneni tongti teyarir asütsü sarasademer, ta sangdong ajangasa ashi.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Tzürang

(n) tzü aser ali na prongla nung litetba shiruru (crocodile)

* Tzürang ya ayong tulu tzüküm nung angur.

Tzüreptsü

(n) ango dak aketba tashikang (fins of fish)

* Ango dak aketba tzüreptsü endoker aon asor.

OLONG PAITEP # 7418

1		2		3		4	5			
				6						7
		8								
9				10		11				
			12					13		
						14				
16						17				

TIPIEN

1. Nisung jenti
4. Tsük rudenba
6. Temzüng tesashi
8. S___i
9. Nisung rongnung telemasa
10. Anogoshi
12. Ajanga aor
13. Tsük rizüngdak
14. Tebang nungi adokba
16. Süngdong tatembangtiba
17. Meputep

- (5)

- (5)

- (5)

- (3)

- (3)

- (4)

- (4)

- (3)

- (3)

- (5)

- (5)

LANGTSÜNGLEN

1. Tenük telong
2. Committee dang ajar
3. Yagi ki okdoker
5. Yim lenmang
7. Temoatsü keter meyipa aruba
11. Kanga junga menemba
12. Kenyongi majinü
13. Rong kanga tulu

- (9)

- (5)

- (7)

- (5)

- (9)

- (7)

- (5)

- (5)

OLONG PAITEP # 7417 TELANGZÜBA**TIPIEN :**

1. Semtu, 3. Lepko, 5. Bilem,
8. Ulu, 10. Tsünpang,
11. Tesangwa, 13. Aoksa,
15. Putir, 16. Yipru.

LANGTSÜNGLEN :

1. Sayu, 2. Teb, 4. Kimong,
6. Lungkak, 7. Milak, 9. Zünga,
10. Temopu, 12. Walu, 14. Ali.

NAI-A YA METETTER

Social media star aser professional wrestler Logan Paul-i auction ka nung pa indang Pokemon trading card \$16.5 million (Rs 1,497,469,165) agi yokdoka world record tasen ka yangluogo.

Anogo 42 nü bidding process sülen venture capitalist AJ Scaramucci-i sen timtiba agütsü. Pa ya taoba White House communications director Anthony Scaramucci'er jabaso lir.

Iba "expensive trading card ever sold at auction" otsü tasen ya Guinness World Records adjudicator Sarah Casson ajanga kuli agütsü.

Mizoram CM-i Tripura aser Bangladesh den sendaktepha apu lapoktsü

Aizawl, February 17, 2026

(Agencies): Mizoram Chief Minister Lalduhoma-i February 17, 2026 nü Tlawng River madak Lengtekai Bridge lapoktsüogo.

Iba mapatong ya Ministry of Road Transport & Highways-i Rs 43.83 crore endoka yanglu.

Iba apu dang Faith Bridge ta ajar aser 100-meter talang apu ya lendenlen 7.5 meters lir aser anatsülen 1.5-meter footpaths lir.

December 2024 nung apu yanglutsü tenzükdang pulley failure ajanga mapang talangka agitsüsa aküm ta Chief Minister Lalduhoma-i ashi.

Ita aika technical maparen yanglushiba sülen April 2025 nungi apu yanglutsü tenzükba timtem kecha melii renemogo ta paisa ashi.

Iba apu tasen ajanga Bailey bridge tejentem melenzüksü aser iba apu ya tenüng dak jaloka yangluogo ta CM Lalduhoma-isa ashi.

Iba apu ya Mamit district atema tongtipang corridor ka lir aser iba district nung yimtsüng 90 (Census 2011) jungnüa nung nisung 85,000 shi alir. Iba district nung Chief Minister Rubber Mission kübok rubber kanga

junga tsünür ta paisa metetdaksü.

Iba apu ajanga Mizoram-i Tripura aser Bangladesh den sendakteper aser Langkaih river sand resources, Lengpui Airport aser National Institute of Technology Mizoram amala den sendakteper. Regional connectivity ulushia aodang Mamit-Bairabi corridor tuluba akümtsü ta Lalduhoma-isa ashi.

Union Minister Nitin Gadkari aser Centre sorkari maneni amalitepa yariba atema pelar ta paisa shisem.

Congress nungi anentsüba MLA Ahmed-i Raijor Dal nung aden

Guwahati, February 17, 2026

(Agencies): Congress nungi anentsüba MLA Sherman Ali Ahmed-i February 17, 2026 nü Raijor Dal nung denogo. Anogo ana tsünga Assam nung opposition party tongtiba Congress nungi lennir anati party toktsüogo.

Ahmed ya Baghbor constituency nungi kümsük asemben tashi MLA lir aser Barpeta district kübok Kalagachia nung Raijor Dal president Akhil Gogoi-i anir tongti ketdangsürtemi pa pelashishia agizük.

Ahmed-i taruba Assembly

elections nung pai Mandia constituency nungi nomination meshitsü ta ashi.

Ahmed ya taoba mapang sorkar ketdangsür ka liasü aser 2011 küm All India United Democratic Front nungi mezüng atema Assam Legislative Assembly züngsem aküm.

AIUDF nungi pa meindokba sülen Indian National Congress nung züngsem aküm aser 2016 o 2021 Assembly elections nung maneni Baghbor menden nungi takok angu.

Pai party discipline alema inyak ta tai tonglokja October

2021 nung pa Congress nungi züngdoka liasü. Pa party nungi manentsüdang Darrang district nung sorkar ali meyipa agiba maparen nung o tamajung jembiba atema apu.

Kümsük asemben tashi Congress MLA Abdur Rashid Mandal-i tan hopta tetenzüklen Raijor Dal nung adenba sülen tanü Ahmed-i kasa party nung denogo.

Assam nungsa taoba state Congress party president Bhupen Kumar Borah-i resignation züluba party high command-i magizüki olemtepdar.

Priyanka Gandhi-i Assam nung candidate screening asütsü

Guwahati, February 17, 2026

(Agencies): Priyanka Gandhi Vadra-ia February 18 nungi tenzüka anogo ananü Assam semdangtsü.

Priyanka-i Assam Assembly elections agitsü aliba atema maparen inyakba meyipa repringshitsü, candidates shimtetsü aser party organisational network akangshitsü.

Congress general secretary

Priyanka ya Assam elections asoshi Congress party screening committee nung convenor lir.

Lai Assam nung political affairs committee, MLAs, district presidents, frontal organisation heads, working presidents, Members of Parliament, legislature party leaders, cell heads aser booth-level coordinators den ajurutepa sendentem amentsü

Assam assembly elections atema screening committee nung Lok Sabha MP Imran Masood, Lok Sabha MP Saptagiri Sankar Ulaka aser Sirivella Prasad nunger dena lir.

Assam legislative assembly opposition bench nung Indian National Congress MLA 26, All India United Democratic Front 15 aser Communist Party of India (Marxist) MLA 1 lir.



Manipur State Commission for Women (MSCW)-i Bishnupur District Administration den yaritepa "The Sexual Harassment of Women at Workplace (Prevention, Prohibition and Redressal) Act, 2013" indang sensitization program ka agidang tangokba noksa angur. Iba sentong ya Mini Secretariat Complex, Bishnupur nung Conference Hall nung agi aser Manipur nungbo tang tashi nung iba Act kübok ken o ka dang benoka mali ta metetdaksü.



Bangladesh Nationalist Party indang mendenpuba Tarique Rahman-i Bangladesh indang ato kilonser ka ama inyaktsü atema Mongulbarnü Dhaka nung Tir Mohammed Shahabuddin (abelen) matsüngdang azüngashiba noksa nung angur.Bangladesh Nationalist Party indang mendenpuba Tarique Rahman-i Bangladesh indang ato kilonser ka ama inyaktsü atema Mongulbarnü Dhaka nung Tir Mohammed Shahabuddin (abelen) matsüngdang azüngashiba noksa nung angur.

Anogo 60 tsüngda nok-nü yutsütsü akhangba Hamas-i magizük

Cairo, Tsüklai/February 17 (Agencies): Israel nunger sorkar tenzükertemi Gaza nung amendaker aliba teloktem dang anogo 60 tsüngda disarm asütsü ajita mesüra Irael-i rara tenzükhitsü ta amokmerenba Hamas-i aitsüogo.

Hamas lenir tejen Mahmoud Mardawi-i Al Jazeera Mubasher dang ashiba agi, iba takhangba agütsüba indang pai kecha memetet.

"Israel Ato Kilonser Benjamin Netanyahu-i lemsatepba olen aser media balala ajanga sangdongba ya tang sensaksema aliba nung sendaka mali," ta pai ashiba Al Jazeera Arabic-i metetdaksü.

Israel Cabinet Secretary Yossi Fuchs-i Jerusalem nung Hombarnü osangbenertem den senaksema mapang, Hamas-i anogo 60 tsüngda disarm mesüra parnoki asendenshir

Gaza amak tenzüksü ta amokmerena liasü.

Fuchs-isa, United States administration-i parnok dang ita ana atasatsü atema mepeshia liasü ta ashi. "Onoki aji akümtsübur," ta pai ashi.

Inyakyim ya kodang tenzüksü iba indang osang tejangja magütsü, saka Fuchs-i ashiba agi February 19 nü US tir Donald Trump indang Board of Peace den senden amenba sülen tenzüksü akok.

"Onoki ken o asadangtsü. Tebilemba atalokra tajung. Ajita mesüra IDF-i (Israel sepai) parnok mission tembanga inyaktsüsa akümtsü," ta pai ashi.

Hamas lenir Mardawi-i Al Jazeera Mubasher dang ashiba agi, rara tenzükhira parnok meketa aliba tesem tensa kanga mejungi akümtsü aser Palestine nungertemi kodanga

bendanga magütsütsü.

Ceasefire atema nangzüktepba tanabuba shilem January ita tom nung tenzükgoko, kong US-i ashiba agi, parnoki Hamas pur disarmament atema inyaktsü aser international peacekeeping force ka yoktsü. Israel-i Gaza atsünger ali tashibo parnoki prangbong injang metoktsütsü ta Hamas puri shiogo.

Iba ita tetenzüklen Bendanglen Hamas political lenir Khaled Meshaal-i, Gaza nung Palestine nunger teloktem disarm asütsü ayongzükgba magizük aser ashiba agi, prangbong injang aginra parnok ya atsüngtoktsü atema kanga temela akümtsü.

Israel-i Gaza amakba sülen nisung 72,000 dak tema süogo, kong tanurtema aika densema lir. Ceasefire benoker liaka Israel-i Gaza maneni maka arudar aser ceasefire mapang Palestine nunger 600 dak tema tepsetogo.

Pakistan nung police aser telungpur-tem khatep; nisung ter dak tema asü

Islamabad, Tsüklai/February 17 (Agencies): Northwest Pakistan nung Bomb ana amshia amakba den police aser telungpur tsüngda khatepba sülen nisung ter dak tema tepsetogo.

Hombarnü Telungpurtemi Khyber Pakhtunkhwa province kübok Bajaur district amakba sülen tanur ka aser security personnel 11 khaseta liasü, ta Pakistan military-i Mongolbarnü metetdaksü. Kasa lendong nung tetsür aser tanurtem densema nisung tenet yirua liasü.

Gari nung bomb enoka bener Bajaur nung security checkpoint ka amak, ta local police ketdangsür Zafar Khan-i Associated Press news agency dang ashiba den, bomb apokba tashi agi anasa aliba ki ka chirepba sülen tetsür chanu ka tepseta liasü, ta shisem.

Hombarnü Afghanistan den arrtsü nung Khyber Pakhtunkhwa kübok Bannu district nung police station ka kikümtong anasa motorcycle ka nung bomb toktsür pokdakja nisung ana tepsetba sülen iba

lendong ya ataloka liasü.

Bannu nung iba police station amakba mapang nisung 17 yiru, ta ketdangtsürtemi ashi.

Bajaur nung azütokshi lendong indang osang agütsüba mapang AFP news agency-i ashiba agi, gari nung bomb enoka bener suicide bomber kati tamangba yimsü sayuba college ka jara nung tsükokja bomb pokdakja liasü.

Bajaur nung security checkpoint aser seminary na amakba ya sendaka ali mali iba indang osang tejangja memetet.

Tanga tatalokba ka nung Khyber Pakhtunkhwa kübok Shangla district nung meita aoba sentong ka benoka inyakba mapang police asem aser telungpur asem tepseta liasü, ta police-i metetdaksü.

2021 küm nungi Pakistan nung telungpurtemi security force tali maka arudar. 2025 küm mezüngbuba quarter asem nung nisung 2,400 dak tema tepset. Item lendong bener arutsüba ya Islamabad-i Pakistan Taliban dak tai tonglokja arudar.

MULUNGZEN O



Asür Toshimongba Lkr, Mopungchuket yim nungi, arishi küm 97 tashi lia arur 14-02-2026 nü iba akümlü tembangogo. Pa mapang tatsüka shiranga aliba mapang Impur Christian Hospital nungi Doctori anir nursetemi ki tashi arua yariogo. Yamaji nüburtem shirnokisa nübu, senti mapang, rongsen aser aria bilemba mulungjang tener asükhü tashi yaritepogo, nenok ajak dang Kanga pelar. Tsüngremi nenok kija kibong tali moajangma.

~ Temeim Kinungertem.

Office of the Chungtia Baptist Arogo



LEMSATEPER

Alima asoshi aser talisa Chungtia nüburtem asoshi Sojasor Tamang Rongnir, Rev. Dr. L. Kari Longchar, shibai pei taküm bendanga agüja lenla balala nung nüburtem tenzüka aruogo, Lokti lenisübaren balala nung tongti shilem agia pei sempet tajungtiba agi takok ngua aniba ajiteta, Chungtia Arogoi pa nem 'Tongti Jong' naroküm waloktsüba Chungtia sensosanger ajak nem iba osang metetdaksür.

Sd/-
Rev. M.Laka Tzüdir
Pastor

Sd/-
I. Meren Longchar
Secretary cum Cashier

DECLARATION/CHANGE OF NAME

I, Shri. Ngou of Pathso village change my daughters name from NUCHAI N to ESTHER NECHAI KHIAMNIUNGAN vide registration no 356/2026 dated 06/01/2026. So forth my daughter's name will be ESTHER NECHAI KHIAMNIUNGAN from today.

Nenoki Iran mesamatsütettsü:Ayatollah Ali Khamenei

Tehran, Tsüklai/February 17 (Agencies): Mongulbarnü Iran indang Supreme Leader Ayatollah Ali Khamenei-i US Tir Donald Trump dang Iran samatsütsü ayongzükgba aser alima nung tashi tulutiba military force dak kanga sashia maka parnok tanaben menokdaktettsü, ta ashi. US aser Iran tsüngta Geneva nung nuclear ken o kar ajanga jembishinü tenzüker lia iba o ya pai ashi.

Khamenei-i X nung posts balala prokshiba nung, "US Tiri alima nung mitkar tashi tulutiba par ket nung lir ta shijen ashir. Alima nung tashi tulutiba mitkar dak mapang nung kanga sashia maka parnok tanaben menokdaktettsü," ta shia liasü.

"America nungeri Iran tsütsüi warship ka yokogo ta mapang shia jembir. Atangji nung warship ya lendong tulu aliba mitkar indang oset lir. Ajisüaka warship ta lendong tulutiba nüknüji iba warship tziyüm telungi yoktetsüba ya lir," ta pai ashi.

"US Tir küm 47 tashi United States-i Islamic Republic mesamatsütetü aru ta ashi. Ibaji temulung rakpoka nangzükgba tajung ka lir. Ni ya ashir, 'Naia ibaji meinyaktettsü'," ta pai ashi.

Mongulbarnü nuclear ken o jembiba nung pa "indirectly" shilem agitsü ta US Tir Donald Trump-i shir anogo ka lir Khamenei nungi iba o ya arur. Tehran-i taoba mapang mepetmesü nungi angazükogo aser tangbo jembishinü kanüa alitsü akok, ta shia liasü.

"Parnoki tezüngzüktep meyangluba ajanga timtemba aginüa alitsü amabo mebilemer. Parnok indang nuclear tashi raksatsütsü atema B-2s yoktsü melen tezüngzüktep yanglutettsü. Aser onoki B-2s yoktsüla. Parnok tali temulung agütsütsü imlar," ta Trump-i ashi.

US-i aircraft carrier Iran-i amokmerena tanabuba Middle East leni yokogo aser jembishinü akaba nung tamakok mongutetra

amaktsü mitkartem renemshir ama ketdangsür temi yimya agi sayur.


June ita mamakdang Washington-i Iran dang par li nung uranium enrichment inyakyim toktsütsü akhangba mechi jembishinü makateti anenadok, koba nuclear noktsü yanglutsü asoshi lenmang tajung ka ama US-i repranger.

Ajisüaka Iran-i zero enrichment magizüksü ta ashir aser sanction agientsü melen nuclear sentong aziüktsü indang jembitsü mulunga lir ta ashir.

Iran aser US tsüngta Geneva nung Mongulbarnü nungi asendenshir jembishinü akar. Iba jembishinü nung US envoy Steve Witkoff aser Jared Kushner shilem agir, koba Oman tetsüngtai ia ayongzükgba lir aser yangi Iranian Foreign Minister Abbas Araqchi adener.

Iran-i amokmerena jembishinü masütsü aser missile sentong indang mejembitsü ta ashir.

Tyson aser Mayweather na asayatsü jangjaogo



Tsüklai/February 17, 2026

(Agencies): Mapang talang ka nungi Mike Tyson aser Floyd Mayweather Jr na exhibition asaya ka asayatsü ta jembia aruba tang anogo aser koba tesem nung asayatsü ajak jangjaogo.

Tyson-i March ita Africa nung asayatsü shidangba sülen tang tena asaya ya April 25 nü Democratic Republic of Congo nung asayatsü jangjaogo.

Ring Magazine nungi Mike Coppinger-i iba osang ya mezüngbuba metetdaksü aser Congo Vice Prime Minister Mobutu Nzanga Ngbangawe-ia social media ajanga iba osang jangjatsüogo.

Mayweather ya Netflix nung Manny Pacquiao den

asayashitsü atema jembia aruogo, saka sensaksem bangdaka aliba mapang Tyson den exhibition asaya ya tama kümogo.

Arishi küm 59buba nunga Tyson ya ajaki tsübuba taoba mapang champion ka lir. "Iron Mike"-i pa indang career nung asaya 50 akok aser 7 mekoki liasü. Pai asaya 44bo knockout agi akok aser pa ya arishi küm 20 asüba mapang heavyweight champion tanobusang aküm.

Kasa mapang nung arishi küm 48 tain Mayweather ya asaya 50 nung khi danga tamakok mongui asaya nungi anisüngzüka liasü. Pai weight division pongu nung world title bena liasü.

Asaya nungi anenba sülena

Tyson ya exhibition asayatem nungbo shilem agia arudar. Pa 2024 küm November ita YouTuber aliba nungi boxer akümsang Jake Paul den Arlington, Texas nung asaya. Asaya reprangtsü asoshi nisung 70,000 shi sentepba den pay-per-view number aika süaka Tyson-i round ti asayaba mapang khi danga jung junga metsüngshi-i liasü. Ajisüaka pa tenüing ya iba asaya nungbo tang tashi kanga taret lir

Conor McGregor koka 2017 küm asaya nungi anenba sülen Mayweather-a exhibition asayatem nungbo asaya aruogo.

Pa Tenshin Nasukawa aser Logan Paulna den aser tesüsa 2024 küm August ita John Gotti III den asayaogo.

Premier League nung Muslim nunger lumirtem chiajemtsü melatsü

Tsüklai/February 17, 2026

(Agencies): Premier League aser English Football League nati Ramadan mapang Muslim nunger lumia aliba asayatem chiajemtsü atema asaya khi anenba atatsü asoshi melatsü. Kümtem tsüngda iba inyakyim ya English football indang calendar nung shilem ka kümogo.

Ramadan ya iba hopta tenzüksü aser ita ka shi agitsü. Iba mapang Muslim nungertem anütok nungi anülü tashi chia majemer.

UK nung anü ya 17:00 aser 19:00 GMT tsüngda aitsü anungji iba mapa asayaba asayatemji Honibarnü 17:30 nung asaya tenzüksü aser Deobarnü 16:30 nung asaya tenzüksü na dang denchitsü, anungji item asayatem nung asaya khi atema anenba atatsü.

Taoba season tem nung ama captain aser asaya ketdangsürtemi Ramadan amungertem tzü mesüra energy supplements tema chiajemtsü

atema asaya tom nung mapang ka shimsü.

Asaya anenba atatsü atema asaya metenzük dang jembir alitsü. Ajak dang tongtibangtibaji iba break ya tactical time-out mesüra general drinks break ka ama magitsü.

Asaya nung minprong kecha masütsü, aser goal-kick, free-kick mesüra throw-in amala mapang dang break ya agitsü.

Iba inyakyim ya mezüng 2021 küm April ita Leicester City aser Crystal Palace na asayaba mapang benoka inyak. Asaya nung goal-kick ka mapang Wesley Fofana aser Cheikhou Kouyate na chiajemtsü atema temelaba agüja liasü.

English football team tem nung kin, shilu aser tamangba yimsü balala dak amangertem aika meyoktepa lir. PL nung Muslim nunger asayatem timba kuma odor aser iba ajanga iba amala inyakyim ya benoka inyaksü kanga nüngdaka kümogo.

World Cup atema Bracewell melena Cole shimogo



Tsüklai/February 17, 2026

(Agencies): Michael Bracewell yiruba sülen New Zealand indang ICC Men's T20 World Cup squad nung pa melena all-rounder Cole McConchie züngoksemogo.

McConchie ya reserve asayar ama India-i arur liasü aser tang pa Event Technical Committee-i agizükogo.

Canterbury Kings T20 captain ya küm 14 asayaba mapang T20 asaya 133 nung asayaogo, kong international asaya 12 asayaba densema lir. Pa lenisüba nung par team trokben atonga Super Smash finals tongogo.

McConchie ya NZ team nungi mezüngbuba 2021 küm Bangladesh den asayaba mapang asaya aser pai iba asayamung nung wicket tenet agia pa par team nungi wicket timtiba agiba asaya tanabuba liasü.

Arishi küm 34 tain asayar

yagi ashiba agi, pa team nung züngoksemba atema kanga pelar.

"Ya tamamangtsüka," ta McConchie-i ashi.

"India aser Sri Lanka na nung World Cup asayatsüba dang nungi tajungba kechi ali.

"NZ tola asemtsü atema teti meranga asayar aser team nung züngoksemba ya jangrademtsüka lir. "Ni akokba tashi team nem teyari agütsütsü yongya atar," ta pai ashi.

New Zealand puri taküm iba asayamng takok aser tamakok ajak ngua asaya arudar.

Mezüngbuba asaya nung parnoki wicket 10 agi United Arab Emirates akok, saka tanabuba asaya nungbo parnok South Africa-i wicket tenet agi koka liasü.

Ajisüaka parnoki meyapa arur kanga junga asaya-a Afghanistan aser Canada naprongla koka taruba round tongtetogo.

T20 World Cup: New Zealand Super 8 tongogo

Tsüklai/February 17, 2026

(Agencies): Mongolbarnü T20 World Cup nung New Zealand den asayaba mapang Canada nunger asayar Yuvraj Samra ya associate nation nungi asayar kati T20 World Cup nung century ka yangluba mezüngbuba asayar aküm, saka NZ akoktsü atema aji teperi masü asü aser parnok wicket ti agi tamakok angu.

Asaya nung Samra-i ball 65 nung run 110 yanglu, kong four 11 aser six trok azükba densema lir. Pai teyari tulu agüja Canada team-i asayar 4 out ser run 173 yanglua liasü.

Brampton, Ontario nung asoba asangur chausang yagi ball 58 nung century yanglu aser associate linük nungi asayatem rongnung USA nunger asayar Aaron Jones-i

taoba World Cup nung Canada den asayaba mapang out mesüi run 94 yanglur aliba ajateta liasü.

Arishiküm 19 ser anogo 141buba nung pa ya T20 World Cup nung century yangluba asayar tanobusang kümogo. Pai Pakistan nunger asayar Ahmed Shehzad ajatetogo, shibai 2014 küm Bangladesh den asayaba mapang arishi küm 22buba nung century ka yanglua liasü.

Samra ya Jacob Duffy-i ball aonba mapang square nung Glenn Phillips-i catch out sütsü. Pa MA Chidambaram Stadium, Chennai nung asaya reprangertemi nokdaker teka malokja tetushi agütsü.

Asaya nung New Zealand nunger bowler Matt Henry, Kyle Jamieson, Jimmy Neesham aser Duffy nunger ajaki wicket kaka agia liasü.

Run arishiba mapang New Zealand puri asaya junga metenzükter aser opener Tim Seifert aser Finn Allen na run 30 dang yanglur kanga kara out süatok.

Ajisüaka Canada nunger bowler temi iba maongka agia NZ pur nongshia masayatet aser Rachin Ravindra aser Phillips na senteper run 146 yanglua parnoki ball 29 anunga lia asaya koka liasü.

New Zealand nunger asayatem rongnungi Phillips-i run timtiba yanglu. Pai ball 36 nung out mesüi run 76 yanglu aser Ravindra-ia out mesüi ball 39 nung run 59 yanglu.

Iba asaya akokba sülen New Zealand pur taruba round-i iogo aser Canada, UAE aser Afghanistan nunger ajak tsükdaksüogo.



Pallekele Sri Lanka nung Ireland aser Zimbabwe na T20 World Cup nung asaya ka asayatsü lia tzünglu aruba ajanga ground meyibanger aliba Iris fan kati reprangba noksa nung angur. Tzünglu aruba ajanga iba asaya masayatet saka Zimbabwe bo Super 8s-i iogo.

BILEMDANGANG

"Tajung inyaksü atema arendaka malitsüla."